

影印
文淵閣

四庫全書

影印

文淵閣四庫全書

第三五〇冊

北京出版集團公司
北京出版社

本冊目次

三朝北盟會編(一)

宋 徐夢莘撰……………一

欽定四庫全書

史部
三朝北盟會編卷一至七

詳校官庶吉士臣張溥

編修臣裴謙覆勘

總校官檢討臣何思鈞

校對官中書臣楊世綸

膳錄監生臣沈智

欽定四庫全書

史部三

三朝北盟會編

紀事本末類

提要

臣等謹案三朝北盟會編二百五十卷宋徐

夢莘撰夢莘字商老臨江人紹興二十四年

進士為南安軍教授改知湘陰縣官至知密

州以議鹽法不合罷歸事蹟具宋史儒林傳

夢莘嗜學博聞生平多所著述史稱其恬於

欽定四庫全書

三朝北盟會編
提要

榮進每念生靖康之亂思究見顛末乃網羅

舊聞會粹同異為三朝北盟會編自政和七

年海上之盟迄紹興三十一年上下四十五

年凡勅制詔詔國書書疏奏議記序碑志登

載靡遺帝聞而嘉之擢直秘書省云云今其書

抄本尚存凡分上中下三帙上為政宣二十

五卷中為靖康七十五卷下為炎興一百五

十卷其起訖年月與史所言合所引書一百

二種雜攷私書八十四種金國諸錄十種共一百九十六種而文集之類尚不數焉史所言者殊未盡也凡宋金通和用兵之事悉為詮次本末年經月緯按日臚載其徵引皆全錄原文無所去取亦無所論斷蓋是非並見同異互存以備史家之採擇故以會編為名然自汴都喪敗及南渡立國之始其治亂得失循文攷證比事推求已皆可具見其所以

然非徒鉅釘瑣碎已也雖其時說部稂雜所記金人事迹往往傳聞失實不盡可憑又當日臣僚劄奏亦多誇張無據之詞夢莘概錄全文均未能持擇要其博瞻淹通南宋諸野史中自李心傳繫年要錄以外未有能過之者固不以繁蕪病矣考夢莘成此書後又以前載不盡者五家續編次于中下二帙以補其闕靖康炎興各為二十五卷名曰北盟集

補今此本無之殆當時二本各行故久而亡佚歟乾隆四十六年四月恭校上

總纂官_臣紀昀_臣陸錫熊_臣孫士毅

總校官_臣陸費墀

欽定四庫全書

三朝北盟會編卷一

宋 徐夢莘 撰

政宣上帙

起政和七年七月四日庚寅盡政和八年四月二

十七日己卯

政和七年秋七月四日庚寅登州守臣王師中奏有遼人薊州漢兒高藥師僧即榮等以舟浮海至文登岸詔

欽定四庫全書

三朝北盟會編
卷一

師中募人同往探問以聞 先是政和元年朝廷差童

貫副鄭允中奉使遼人有馬植者潛見童貫于路植燕

京霍陰人涉獵書傳有口才能文辭長於智數見契丹

為女真侵伐邊害益深盜賊蜂起知契丹必亡陰謀歸

漢說貫以邊事是時童貫奉密旨使覘其國於是約其

來歸植數上書奏上喜賜姓李名良嗣蔡京童貫力主

之以圖取燕時薛嗣昌和詵侯益揣知朝廷有意幽薊

並迎合附會倡為北事和詵知雄州以厚賂結納朔方

豪雋士多歸之以收燕山圖來上又中山守張杲高陽

關安撫吳玠亦獻議燕雲可取河東經畧薛嗣昌得河

朔謀人之辭往往潤色以希禁密意每陛對論及北事

輒請興師嗣昌又委代州安撫王機探伺遼人之隙陳

攻取之策時武應等州屢來投附機悉接納又有王師

中全家來忻代上詔令師中知登州以伺其事然未有

以發會是年登州奏有遼人船二隻為風漂達我駝基

島乃高藥師曹孝才及僧即榮率其親屬老幼二百人

欽定四庫全書

三朝北盟會編
卷一

因避亂欲之高麗為風漂至州具言遼人以渤海變亂

因為女真侵伐女真軍馬與遼人爭戰累年爭奪地土

已過遼河之西今海岸以北自薊復至興瀋同咸州悉

屬女真矣登州守王師中具以奏聞上命中使押詣蔡

京第令童貫僉議京貫因同具奏國初時女真常奉貢

而太宗皇帝屢市馬女真其後始絕今不若降詔遵故

事以市馬為名令人訪其事體虛實如何上可之詔登

州守臣王師中募人同高藥師等賣市馬詔泛海以往

探問其後通好女真議兵相應夾攻滅遼國家禍變自是而始 蔡條北征紀實曰政和元年童貫副鄭允中奉使北庭其遼主天祚欲與童貫一相見因使貫覘其國北討之意已形於此而中外未知也然其時天祚方肆縱欲見貫者但希中國玉帛奇玩而已而中國寔侈亦自是而始故貫所齎奇牒至運二浙髹漆之具火閣書櫃牀椅之屬悉往以遺之相誇尚而已貫回其所得珍玩亦甚厚允中以尚書為奉使而貫以節度使為之

欽定四庫全書

三朝北盟會編
卷一

三

歲次己未春三月辛未朔二日壬申大遼李良嗣密遣

人來雄州投蠟彈云天慶五年三月四日遼國光祿卿

李良嗣謹對天日齋沐裁書拜上安撫大學足下良嗣

族本漢人素居燕京霍陰自遠祖以來悉登仕路雖食

祿北朝不絕如綫然未嘗少忘堯風欲投中國而莫遂

其志比者國君嗣位以來排斥忠良引用羣小女真侵

凌官兵奔北盜賊蜂起攻陷州縣邊報日聞民罹塗炭

宗社傾危指日可待邇又天祚下詔親征女真軍民聞

欽定四庫全書

三朝北盟會編
卷一

四

之無不惶駭揣其軍情無有鬪志良嗣雖愚戇無知度

其事勢遼國必亡良嗣日夜籌思偷生無地因省易繫

有云見機而作不俟終日語不云乎危邦不入亂邦不

居良嗣久服先王之教敢佩斯言欲舉家貪生南歸聖

域得上先人丘墓以酬素志伏望察良嗣忱誠不妄憫

恤轍魚代奏朝廷速俾向化儻蒙密旨允其愚懇預此

會期伏俯前去不勝萬幸和詵具其事聞奏上令太師

蔡京太尉童貫共議可否十日庚申京與貫奏云自古

招徠國之盛德又况遼國用兵軍民不附良嗣歸明故當收留乞敕和詵密諭其來使宜暫令良嗣回期以四月一日夜入境夏四月庚子朔良嗣等夜分越界河初

九日戊申良嗣入雄州庭謁詵詵使人掖上廳各具禮贐是日詵奏朝廷有旨令良嗣赴闕十八日丁巳良嗣見于延慶殿上親臨軒慰勞禮異上問所來之因即奏上臣國主天祚皇帝耽酒嗜音禽色俱荒斥逐忠良任用羣小遠近生靈悉被苛政比年以來有女真阿固達

欽定四庫全書

三朝北盟會編
卷一

五

者知天祚失德用兵累年攻陷州縣加之潰卒尋為內患萬民罹苦遼國必亡願陛下念舊民遭塗炭之苦復中國往昔之疆代天譴責以順伐逆王師一出必壺漿來迎願陛下速行薄伐脫或後時恐為女真得志蓋先動則制人後動則制于人上嘉納之遂賜姓趙授朝請大夫祕閣待詔又曰朝廷既有意于燕雲而蔡京為國興利以備兵興夫用仍行香茶鹽礬等法令州縣立通年租額以最殷考其賞罰守令奉行罔敢少怠又有和

糴均糴對糴銜糴以備軍食累年于茲民力遂耗所甚者商人賣法重獲厚利朝廷糴本元降州縣輸納者實未嘗得悉為官吏所有天下多故京啟之也

八月三日戊午登州守王師中既被詔乃選擇將吏得七人各借進武校尉差平海軍指揮兵船同高藥師等行

二十二日辛丑高藥師等下船往女真至彼境北岸相望女真巡海人兵多船不敢近幾為邏者所害遂復回

欽定四庫全書

三朝北盟會編
卷一

六

政和八年正月三日丙戌高藥師回至青州高藥師至青州還奏謂雖已到彼蘇州界望見岸上女真兵甲多不敢近而回守臣崔直躬奏其事於是上為赫怒專下宣撫司委童貫措置應元募借官過海人并將校一行并編配遠惡委王師中選有智勇能吏再與藥師過海體問事宜通耗女真軍前講買馬舊好降御筆通好女真事監司帥臣並不許干預如違並以違御筆論

四月二十七日己卯遣武義大夫馬政卒海軍卒呼延

慶同高藥師等過海至女真軍前議事 童貫與王師

中選馬政可委呼延慶善外國語又辨博同將校七人

兵級八十人同高藥師去女真軍前 太宰鄭居中奏

乞守盟誓罷遣女真人使 時太宰鄭居中奏乞罷使

女真之人又於朝堂責蔡京曰朝廷欲使人女真軍前

議事夾攻大遼出自李良嗣欲快己意公為首台國之

元老不守兩國盟約輒造事端誠非廟筭且在昔章聖

皇帝與大遼昭聖立誓至今幾二百年兵不識刃農不

欽定四庫全書

三朝北盟會編
卷一

七

加役雖漢唐和戎未有我宋之策也公何以遂興此舉

且兵者不祥之器勢不獲已即可暫用昔景德中遼人

舉國來侵真宗用宰相寇準之策親征後遣使議和自

此守約不復入邊者三十九年及慶厯中契丹聚兵境

上以求關南地為名仁宗用富弼報聘增幣觀真宗仁

宗意不欲動兵恐害生靈堅守誓約至今一百七十年

四方無虞今若導主上弃約復燕恐天怒人怨切在熟

慮無貽後悔事繫宗廟豈可輕議又况用兵之道勝負不

常苟或得勝則府庫乏於犒賞編戶困于供役蠹國害

民莫過此也脫或不勝則患害不測京曰上厭幣五十

萬足兩故有此意居中曰歲幣五十萬足兩比之漢世

和單于歲尚給一億九十萬西域七千四百八十萬則

視今與之幣未為失策又漢永初中諸羌反十四年當時

用兵用財二百四十億永和後復經七年用八十萬億

且前古之主豈忍以中國之富填于廬山之壑委于狼

望之北哉蓋聖人重惜生民之本也載在史策非妄言

欽定四庫全書

三朝北盟會編
卷一

八

也京曰上意已決豈可沮乎居中曰使百萬生民肝腦

塗地公實使之未知公異日如何也遂作色而起 知

樞密院事鄧洵武上書乞守信罷兵保境息民 鄧洵

武家傳曰時上意感動欲興師蔡京謀起燕兵洵武屢

折之而蔡京密啟於上不令洵武預議洵武乃約童貫

到樞密院具以利害曉之貫反說洵武曰樞密在上前

且承當取商量也商量得十來年裏不要相拘官家上

方有意相公如此說話恐為他人所奪語已而笑洵武

知京貫之意遂為問目力陳宗社大計請以上意令京條對又上奏曰雍熙中嘗有此舉是時曹彬出河北潘美出河東趙普在南陽聞之上疏切諫彬美卒無功而還因出趙王疏本與曹潘傳進讀曰陛下審視今日謀議之臣孰如趙普將帥之良孰如彬美甲兵精練孰如國初以太宗之神武趙普之謀畧彬美之為將百戰百勝征伐四克而獨于燕雲乃爾況在今日何可輕議且百年盟誓一朝棄之何以令吾民告敵國乎誠恐兵革

欽定四庫全書

三朝北盟會編
卷一

九

一動中國昆蟲草木皆不得而休息矣上大悟翌日語京曰北事難做則休祖宗盟誓違之不祥京色變其議遂寢契丹既衰宰相王黼復為兼弱攻昧之言以動上心洵武復從容為上言曰自西方用兵禁旅減耗近差郊祀立仗人不能足數使天下常如今日治安固無可言設有風塵之警可為寒心上為之動容因勸上宜保境息民謹備自治無啟邊釁王黼言當兼弱攻昧臣獨謂不若推亡固存也方今非獨兵勢如此而又財用匱

乏民力彫弊人皆知之無敢言者臣令取諸路廉訪使者所奏去年兵食實數作榜通冊願陛下置之御坐時賜御覽則天下虛實可知且與強女真為隣孰若與弱契丹乎議復止 樞密之孫鄧椿跋曰右先樞密諫發燕雲事勾龍中丞如淵雖書之恐未信于後世又嘗求汪公應辰跋其尾汪公曰此段已編入徽考刪定實錄中矣馮少卿方手錄于家後求其真蹟藏于九襲以示子孫先樞密掌兵西府不幸宰相 闕 深引太宗趙普

欽定四庫全書

三朝北盟會編
卷一

十

曹彬潘美龜鑑有死不從公歿黼始遂前議云某即公黼即王黼前議即兼弱攻昧之說談經之誤以致敗國事塗炭生靈迄今蹂躪河洛者幾五十許年則兼弱攻昧之說勝也悲夫 朱勝非房水閒居錄曰政和末知雄州和詵奏契丹益發燕雲之兵燕雲亦叛有董龐兒者率眾為劇寇契丹不能制蔡京時領三省事僥倖一切之功遂招龐兒許以燕地王之龐兒上表自號扶宋破敵大將軍董才後歸朝賜姓名趙誦者是也乞遣兵

為援期取中國故地京大喜乃更戍朔方陝右之兵命
江外州軍製袍帶欲以冠帶新民鄧洵武子常知樞密
院為京言南北通好久矣今信一叛人之言而欲敗百
年之盟不可京不聽是時童貫以太師樞密院總邊事
洵武又為貫言西北敵勢強弱不同度我之力能制彼
乎恐兵連禍結卒無已時貫亦不聽洵武乃疏伐燕利
害二十七條名曰北伐問目皆有注其一云出師之名
注云恃此盟誓百年不見兵革絕之必有名以令吾民

欽定四庫全書

三朝北盟會編
卷一

十一

以告敵國餘類此又錄趙普諫太宗北征疏同奏上皇
頗嘉納此議為之緩至宣和初竟出師矣董才者易州
涿水人少負賤沉雄果敢號董龐兒募鄉兵戰金人敗
績主將欲斬之才亡命山谷遂為盜剽掠州縣衆至千
人契丹患其殘賊才踰飛狐靈丘入雲應武朔斬牛欄
監軍函其首來獻政和七年知岢嵐軍解潛招之并其
黨以聞其表有云受之則全君臣之大義不受則生秦
越之異心上召見董才陳契丹可取之狀甚切賜姓趙

名謂 趙普諫伐燕疏并劄子附于此疏曰武勝軍節
度使臣趙普右臣自二月中伏覩忽降使臣差般糧草
及詳勅命知取幽州既奉指揮尋行科配非時舉動莫
測因由邇後雖聽捷音未聞成事稍稽赴復俄及炎蒸
飛芻輓粟以猶繁擐甲持戈而未已民疲師老將恐有
之臣自此月以來轉增疑慮潛思陛下萬機在念百姓
為心聖畧神功舉無遺算至于平收浙右力取河東乘
後代之英奇雪前朝之憤氣四海咸歸于掌握十年時

欽定四庫全書

三朝北盟會編
卷一

十二

致于雍熙唯彼契丹豈為敵對遷徙無常自古難得制
之前代聖帝明王無不置于度外任其隨逐水草皆以
法羈縻之此際官家何須掛意必是有人扶同諂佞誑
惑聰明因舉不急之兵稍涉無名之議非論曲直且覺
淹延將成六月之征頗有千金之費以茲忖度深抱憂
虞切念臣雖寡智謀粗親墳典千古興亡之理得自簡
編百王善惡之徵聞于經史其間禍淫福善莫不如影
隨形煥若丹青明如日月嘗為大訓歷代寶之臣讀史

記見漢武時主父偃徐樂嚴安輩所上長書及唐元宗時宰相姚元崇直奏十事可以坐銷患害立致昇平惟慮至尊未能留意醫時救弊無出于斯又聞前事為後事之師古人是今人之則據其年代雖即不同量彼是非必然無異輒思抄錄專具進呈伏望聖慈特垂披覽謹列逐件如後云伏念臣謬以庸材叨居顯位幸逢千年之運深承二聖之知從白屋而上丹霄非由智畧出卑僚而登極位只是遭逢恩私何啻于鰥魚報效不如于犬馬粗懷性識常積驚惶所恨者齒髮衰殘精神減耗既不能獻謀闕下又不能效命軍前惟有微誠書章上奏今者伏自朝廷大興禁旅遠事征伐驅百萬戶之生靈咸當輦運致數十州之地土半失耕桑則何異為鰥鼠而發機將明珠而彈雀所得者少所失者多只於得少之中猶難入手更向失多之外別有關心前未見于便宜可垂興于詳酌臣又聞聖人不凝滯于物見可而進知難而退理貴變通情無拘執故前聖謂事苦

則慮易兵久則變生臣之愚誠深懼于此秦始皇之拒諫終累子孫漢武帝之回心轉延宗社如忽遲晚恐失機宜而況旬朔之間便為七月竊慮內地先困邊庭荒涼北地則弓硬馬肥轉難擒制中國則民疲師老應誤指呼臣今獨興沮衆之言深負彌天之過輒陳狂瞽抑有其由竊以暮景殘光能餘幾日酬恩報義正在今時恐勞宵旰之憂寧避僭踰之罪慮希聖聽早議抽軍聊為一縱之謀別有萬全之策伏望皇帝陛下安和寢膳惠養疲羸長令外戶不扃永使邊烽罷警自然殊方慕化率土歸仁暨四國以來王料契丹而安往又何必勞民動衆賣犢買刀有道之事易行無為之功最大如斯弔伐是謂萬全臣又竊料陛下非久興兵恐因偏聽其奈人多獻佞事欠防微大凡小輩各務身謀誰思國計或承宣問皆不直言盡解欺君弗憂敗事得之則奸邪獲利失之則社稷懷憂昨者直取幽州未審孰為謀者必無成算俱是誑言其于虛實之間此際總應彰露

臣既不知頭主無以指射姓名伏望官家尋其尤者特正奸人之罪免傷聖主之明所貴詐偽悛心忠臣盡力共畏三千之法同堅八百之基臣於此時欲吐肺肝先寒毛髮驚疑猶豫數日沉思又念往哲臨終尚能屍諫微臣未死惡忍面諛明知逆耳之言不是全身之計但緣恩同卵翼命直鴻毛將酌國士之知豈比衆人之報投荒弃市甘當此日之誅竊祿偷安不造來生之業惟祈聖明特賜察量更有細微別具劄子冒犯冕旒臣無

欽定四庫全書

三朝北盟會編
卷一

十五

任傾心瀝懇憂國忘家涕泗旁惶激切屏營之至劄子曰臣濫守藩方聊知稼穡見當州管界承前多是荒涼戶小民貧程遙路僻量其境土五縣中四縣居山驗彼人家三分內二分是客昨來差配甚覺艱辛伏緣在此直至莫州往來四千餘里或是無丁有稅須至雇人般糧每斛雇召之費賤者不下五百元配二萬石數約破十萬貫錢且如本戶自行費用無多所校乃是二萬家之貧戶出此十萬貫之見錢所以典業賣牛十聞六七

其間兼有鬻男女者亦有弃性命者仍加善誘偶副嚴期自從起發去來已及八十餘日近知內有人戶裏私劫鄉村皆云裝起軍糧未有送納去處原無口食在取盤纏雖不辨其虛真又難行于審覆訪聞街坊竊議前後說得多般稱被契丹圍却軍都兼被劫糧草及令尋看皆却隱藏蓋緣臣無以知軍前事宜祇聽得外面消息况九重密事不應泄于朝廷奈百姓流言已相傳于道路詳其住滯必有艱難伏乞聖慈早令停罷更或遲

欽定四庫全書

三朝北盟會編
卷一

十六

久轉費糧儲潛思今日人情不可再行差配如或再有徭役決定廣有逃移假令收下幽州邊境轉度干戈未息忽然生事未見理長必因有僭濫之徒奸邪之黨但說契丹時逢幼主地有灾星以此為詞曲中聖旨不審戒情上下幽州俱此生涯土宿照臨闕外可以征討若彼能同衆意縱惡主亦難輕不順羣情無災星而亦敗誠宜守道事貴無私如樂禍以求功竊得之而不武此蓋兩省少昌言之士靈臺無有藝之人而况補缺拾

遺合專思于規諫天文歷算須預定于吉凶成茲誤失之尤各負疎遺之罪若無愆責何戒後來 邵伯溫曰

崇寧中居洛因過仁王僧舍得葉子冊故書一篇乃趙中令諫太宗皇帝伐燕疏并劄子其疏與國史所載大畧相似有不同者劄子則惟見于此太宗晚喜佛中令因其所喜以諫云伯溫竊聞太祖一日以幽燕圖示中令問所以取幽燕之策中令曰縱可取孰可守太祖不語久之曰卿可謂遠慮矣太祖自此絕口不言伐燕至

欽定四庫全書

三朝北盟會編
卷一

十七

太宗因平河東乘勝欲搗燕薊時中令鎮鄧州故有是奏太宗下詔褒其言嗚呼中令從祖宗定太平尚以取幽燕為難近時小人竊大臣之位者乃建議結金人滅大遼取幽薊卒致天下之亂悲夫

三朝北盟會編卷一

欽定四庫全書

三朝北盟會編卷二

宋 徐夢莘 撰

政宣上帙

起政和八年五月二十七日戊申盡十二月二日

己卯

五月二十七日戊申廣安軍草澤安堯臣上書乞寢燕雲等事書曰政和八年五月二十七日草澤臣安堯臣

欽定四庫全書

三朝北盟會編
卷二

謹昧死裁書百拜獻于皇帝陛下臣觀商高宗嘗命傅說曰朝夕納誨以輔台德說復于王曰惟木從繩則正后從諫則聖后克聖臣不命其承疇敢不祗若王之休命臣每讀至此未嘗不掩卷嘆息以為天下萬機一人聽斷雖甚憂勞不能盡察堂上遠于百里堂下遠于千里以九重之深而欲盡于四方萬里之遠百辟之忠邪賢佞生民之利害休戚顧不難哉是以帝王之德莫盛于納諫諫行言聽則膏澤下于民天下同臻于安樂之域

社稷之利也臣聞陛下臨御之初從諫如流嘗下求言之詔曰言之不當朕不加罪于是蹇諤之士冒昧自竭咸効愚忠而憮人欲杜塞言路竊弄威柄乃榮誤陛下加以抵誣之罪遂使陛下負拒諫之謗於天下久矣比年以來言事之臣朝奏夕貶天下之人結舌杜口以言為諱乃者宦寺專命交結權臣共唱北伐之議不思所以蠹國而害民上自宰執下至臺諫曾無一人肯為陛下言者咸以前車為戒陛下復何賴焉臣謂燕雲之役興

欽定四庫全書

三朝北盟會編
卷二

二

則邊隙遂開宦寺之權重則皇綱不振此臣所以日夜為陛下寒心者也臣螻蟻之微自頂至踵不足以膏陛下之斧鉞倘使上冒天威必罰無赦臣雖死無悔何憚而不言哉願畢其說以獻焉臣聞中國內也四方外也憂在內者本也憂在外者末也夫天下無內憂亦有外懼蓋自古外國之于中國有道未必服無道未必不來聖人以一身寄乎巍巍之上安而為泰山危而為累卵安危之機不在于敵之服叛去來也則天下國家必固本

以釋末未嘗竭內以事外雖羈縻制禦之不失徒使為中國之藩籬耳曷嘗與之謀大事圖大功俾憂生乎內也昔王都說契丹入塞以率晉兵定人皆以為後患可不鑒哉古者敵國憂在外今者敵國憂在內外憂之患吾能固本以釋末將賢而敵情即剪滅其患不及中原泰山之安有足恃者內憂之懼由吾竭內以事外邦本凋殘海內虛耗累卵之危指日可待外憂之不去聖人猶且耻之內憂而不為之懼臣愚不知天下之所以久

欽定四庫全書

三朝北盟會編
卷二

三

安而無變甚可懼也陛下亦思之乎厥今天下之危如累卵奈何陛下不思所以固本之術委任姦臣竭生靈之膏血欲奉強敵以取必爭之地使上累聖德此億兆所同憂也且天生北國其為中國患自古然矣乃不與吾奮然而爭而轉若乞憐者非畏吾也蓋邊境之上未有可乘之隙度德量力安得不蓄其銳而伺吾隙以逞其所大欲邪將見四境交侵雖有智者不能善其後矣昔秦始皇繼六世之餘烈既併六國南取百越之地以

為桂林象郡北築長城而守藩籬却匈奴七百餘里其
意非以衛邊地并救民死乃貪戾而欲廣大也故功未
立而天下亂漢孝武資累世之積蓄財力有餘士馬強
盛務恢封畧圖制匈奴患其兼從西結烏孫列四郡開
玉門通西域以斷匈奴右臂師旅之費不可勝計至于
用度不足算及舟車因之以凶年寇盜並起始弃輪臺
之地下哀痛之詔豈非聖人之所以悔哉宋文帝元嘉
中比西漢文景分命諸將經畧河南致拓跋瓜步之師

欽定四庫全書

三朝北盟會編
卷二

四

因而國威陳宣帝繼業之後拓土開疆志大不已遂有
呂梁之敗江左日蹙力殫財竭旋為隋氏所滅隋煬帝
負其富強之資思逞無厭之欲頻出朔方三駕遼左旌
旗萬里賦斂百端四海騷然土崩魚爛喪滅國家唐太
宗定海內時稱英主然而東有遼海之軍西有昆丘之
役師旅數動百姓疲勞雖未致于禍敗然不免有中材
庸主之議明皇開元之際宇內謐如邊將邀寵競圖戰
伐西陲青海之戍遼東天門之師磧西怛邏之戰雲南

渡瀘之役沒于異域數十萬人幽寇乘之天下離潰是
皆窮兵貪地好功勤遠罔守持盈之道不顧勞民之弊
孰若周宣中興獫狁為害追之太原及境而止蓋不欲
弊中國怒遠人也故享國日久時人詠其美孝文專務
以德化民凡有不便輒弛以利民與匈奴結和親後乃
背約入盜令邊備守不發兵深入恐勞百姓是以國富
刑清漢祚日永天下歸仁孝元亦納賈捐之議棄珠崖
之陋後世以為美談東漢建武中人康俗阜臧宮馬武

欽定四庫全書

三朝北盟會編
卷二

五

請殄匈奴報曰捨近謀遠者勞而無功舍遠謀近者逸
而有終務廣地者荒務廣德者強有其者安貪人有
者殘自是諸將莫敢復言兵事可謂深達治源者乎歷
觀前代雖征討外國時有異同勢有可否謀有得失事
有成敗然毒蠱四表瘡痍兆姓未嘗不由好大喜功竭
內事外者也昔人謂國雖大好戰必亡故聖人務德不
務廣土王者不治外裔春秋亦內諸侯而外秦楚非謂
中國之力不能制之以其言語不通幣幣不同疆土遼

遠法俗各異居于絕域之外山河之表崎嶇山谷險阻之地是以外而不內疎而不戚政教不及其人正朔不加其國誠不欲竭內以事外故也樊噲嘗願得十萬衆橫行匈奴中季布謂其可斬馮奉世矯詔斬莎車王宣帝議加爵賞蕭望之謂矯制違命雖有功不可違法恐後奉使者為國家生事陳湯誅郅支匡衡劾其矯制而頗命郝靈筌斬默噉姚崇慮彼邀功者生心三朝不加賞抑有由矣是故古者天子控制遠方來則懲而禦之

欽定四庫全書

三朝北盟會編
卷二

六

去則脩而守之其慕義而貢獻則接之以禮羈縻不絕使曲在彼乃聖王制禦外國之常道也在昔東邊遼李牧北邊憚郅都南蠻服孔明西戎畏郝玘此四人者皆明智而忠信寬厚而愛人君臣同體固守邊疆故能威震四裔邊人不敢南下而牧馬士不敢彎弓而報怨或有僥倖一時為國生事興造邊隙邦憲具在夫何足云我宋太祖皇帝撥亂反正躬擐甲冑總熊羆之衆當時將相大臣皆所與取天下者然不能下幽燕兩州之勅

敵豈勇力智慧不足哉蓋兩州之地鄰國所必爭者不忍使吾赤子重困鋒鏑乃置而不問章聖皇帝澶淵之役以契丹大舉來侵不得已而與戰既戰而勝乃聽其求和遂與之盟遂巡引兵而退蓋亦欲國家固而不忍困民力也明矣伏願陛下思祖宗積累之艱監歷代君臣之失杜塞邊隙務守景德舊好選忠義智勇之人如郅都者使守險塞而軍高壘毋戰閉關據阨荷戟而守之無使強敵乘間伺隙窺我邊疆上以安宗廟下以保

欽定四庫全書

三朝北盟會編
卷二

七

生靈豈不遘哉臣前所謂燕雲之役興則邊隙遂開者此也臣觀自古國家之敗未嘗不由宦者專政當時君世主心非不知其然而因循信任不能斷而馭之故終至委靡頹弊傾覆神器不可枝梧而後已大抵此曹手執帝爵口銜天憲則臣下之死生禍福在焉出入臥內靡間朝夕巧于將迎則君心為之必移況隆以高爵分以厚祿加之以信任以資其威福之權哉我宋開基太祖皇帝鑒前世之弊務行剗革內品供奉不過二十人